

Zeitschrift:	Akzent : Magazin für Kultur und Gesellschaft
Herausgeber:	Pro Senectute Basel-Stadt
Band:	- (2005)
Heft:	2
Artikel:	"Refugianten" als Quelle vom Basler Woolstand : "Man soll alle gänzlich abweisen..."
Autor:	Miville-Seiler, Carl
DOI:	https://doi.org/10.5169/seals-843454

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Siehe Rechtliche Hinweise.

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. Voir Informations légales.

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. See Legal notice.

Download PDF: 18.03.2025

ETH-Bibliothek Zürich, E-Periodica, <https://www.e-periodica.ch>

«Refugianten» als Quelle vom Basler Woolstand

«Man soll alle gänzlich abweisen ...»

D Reformation het in vyle Länder zer Folg gha, dass me Lyt mit eren andere Konfession verfolgt und umbrocht het. Me dängg nummen an d Vernichtig vo de holländische Proteschante dur dr spanisch Herzog Alba 1562 oder an d Pariser Bartholomäusnacht 1572. Vyl Mensche hänn miesse flichten und im proteschtantische Basel Schutz gsuecht. Me het ene «Refugiante» gsait (lat. fuga = Flucht); hit saiti men an all-wääg Asylante. Under iine het s vyl Lyt gha, wo dehaim zer «Ooberschicht» gheert und neyi wirtschaftligi Impuls in d Stadt brocht hänn, vor allem d Sydiefärberey und s Wääbe vo Syydebandel, Borden und Franse. Dääre Däätgikait het me «basimänte» gsait (frz. passement = Borde). Das Gwäärb isch zem Dail im Verlaagssystem bedriibe worde, d.h. der Fabrikant in dr Stadt (Bändelheer) het d Uffdräag und s Material uusegää, und Heimarbaiter uff dr Landschaft (Basimänt) hänn s uff iire Wääbstiel verschafft.



Me muess aber nit maine, das alles haig sich konfliktfreu und rybigloos entwigglet. Scho glyy noo dr Basler Reformation (1529) isch de Hiesige dr Zuestroom z vyl worde; die Emigrante hänn z vyl koschtet, und d Zimpft hänn Angscht gha um iir gwäärbliги Monopolstellig. Wägedäm het dr Root 1546 dr «Welschenerloss» uusegää, «dass von nun an kein Welscher als Bürger oder Hintersass angenommen werden soll. Man soll alle gänzlich abweisen». Uusgnoo vo däm Verdikt het dr Root «wenn ein reicher oder kunstfertiger Welscher, der Basel Nutzen, Ehre und Ruhm bringt», koo well: Dä soll men ynenloo. 1700 het dr Root wider d Uffnaam vo neye Burger gspeert, «ausser qualifizierte Subjekte». Gnutzt het das alles nit vyl: dausigi sinn koo, zem Dail aber au wyterzooge, z.B. zem proteschtantische Kurfirscht vo Brandenburg.

Bsunders d Wääber-Zumft het sich als wider mit alle Mittel geege die neye Gwäärb gspeert, wo nit in die alte Zumftornigen ynebasst hänn. Aber mit

der Zyt het dr Root ene d Diuren uffgmacht. Er het au dr ney «Kunschtstuel» zuegloo, wo vom Wullwäaber Emanuel Hoofmaa (Hoffmann) 1667 illegalerwyys (!) uus Holland yygfier worden isch. Uff däm het me 16 Bändel glychzytig kenne wääbe. Dr Syydebandwääberey und -fäärbererey het Basel im 17. und 18. Joorhundert sy Rychedum verdanggt. Und nit numme das: uus dr Bandfäärberey het sich im 19. Joorhundert d Chemieinduschtrie entwigglet – bis zue de hittige Pharma und Life Sciences.

Carl Miville-Seiler

